

黑龍江外記卷七

長白西 清

黑龍江始為將軍者吉林滿洲薩布素富察氏以寧古塔副都

統征羅刹有功因有是

命據通志公在鎮垂二十年凡所興作足傳久遠故一時有文

武幹濟之稱然嘗見侍郎宗室塞爾赫送德處士芳鄉扶父薩

將軍柩歸葬祖塋詩云扶櫬承遺命東歸黑水濱我憐今孝子

人憶故將軍秋冷黃榆日霜連紫塞雲薊門煙樹晚悵望獨斜

曛則謂公歿於鎮者傳聞特異

繼薩布素為將軍者沙納海寶鼎宗室法都宗室揚福托柳成

泰富爾丹那蘇圖卓爾海塔爾岱烏里布額勒圖博第傅霖富

黑龍江外記卷七

一 廣雅書局棗

爾丹綽爾多清葆達爾當阿達色綽爾多國多歡富僧格傅玉

宗室增海傅玉宗室永璋宗室恆秀宗室琳寧宗室都爾嘉明

亮舒亮宗室永琨額勒伯克那啟泰宗室景熠那啟泰觀明並

今將軍宗室斌靜凡三十有四人而中有前後兩任者富爾丹

綽爾多傅玉那啟泰也

將軍國多歡初下車問邸中器具是前任所遺抑有司備辦曰

出於商販悉命還之一日造支窗竿甚佳問價曰不用然則匠

人布施乎命給價而猝召匠詰問知得價乃已將軍觀明照市

價買物仍防閑家人不令商販隱受累嘗買羊報價錢一千五

百呵之曰安得如是賤將苦商販以諛我乎強給三千錢故至

今商販稱二公謂其清節不汙與綽爾多傅玉並堪千古口云使馬

如羊不以入廩使金如粟不以入懷
邊將惟廉公知人情乃能樹威信也

將軍宗室永琨喜吟詩與龔君光瓚唱和有作皆召書甚見親

禮然一筆不當意猝付所司拘繫旋釋之待如初嘗贈龔云塞垣離索少知音兩兩枝頭話夕禽獨爾才華能好古共予筆硯足論心囊中贏得新詩富胸次都無俗念侵魑魅喜人須著意等閒莫漫作狂吟見垂戒之意今寺院多玉華主人詩將軍自號也

副都統以文雅稱者黑龍江慶霖墨爾根富增格皆京師滿洲

慶號雨亭能詩喜作字土人得尺幅寶之福號松巖日事吟咏如諸生既去遺稿一冊土人得之後歸識者攜入都

管庫主事景善伉爽寡合不爲眾喜一日某庫總管承將軍指

黑龍江外記卷七

二 廣雅書局棊

借支庫銀三百兩景不可強之則大恚曰堂委總管欲挾我欽除主事隳職掌耶卒不與其後某主事怯不敢抗擅出銀三千兩應所需幾罹危法殊昧前車之鑒相傳景能詩喜圍碁後陞盛京戶部員外郎

土人以勳閥著者首推將軍塔爾岱瓜爾佳氏齊齊哈爾滿洲

也雍正十年積功授本省將軍乾隆六年九月御賜詩云百戰歸來矍鑠身凌煙姓氏竟誰倫是時合適林中趣憐爾仍隨輦後塵赫奕虎符叨寵舊輝煌竹簡紀功新爲詢閱歷疆場事幾度聞之厪念頻詩卷今存協領穆克登布家嘗屬余以國書譯之穆將軍曾孫也

土人有住京之例尙書阿爾賽都統阿蘭保皆以此起家尙書

漢軍崔氏也初以水師營六品官爲將軍辦棺木誤進雙槽不自安遂居京師受

世宗知累擢將軍總督內用戶部尙書乾隆初爲家丁所戕歸葬齊齊哈爾城北俗稱總都墳都統達呼爾也微時以射名將軍傅玉素知之會選善者隨

駕木蘭意在阿不願行五發故不中拂將軍意鞭三百強遣之至則畱京師累官至鑲藍旗蒙古都統諡壯勇墓在齊齊哈爾城西嘉慶九年

賜葬有碑

公海蘭察

呼倫貝爾索倫也微時爲流人朱姓御貨車往來奉

天吉林爲朱所重會金川用兵公以庫圖勒殺賊有功受知大

黑龍江外記卷七

三廣雅書局索

將軍阿文成公由是累擢將帥爵列上公相傳公貴還鄉宿朱家贈遺特厚又言公征臺灣接弟書訴齊齊哈爾某官詬辱甚公怒奏調某爲戈什哈將報之久見某勤勇過人大呼曰幾誤我遂累薦某至協領皆盛德事近有副都統倫布春布特哈索倫也征川楚有功方賊被執頃爭欲一見倫大人見則言將帥皆如公我輩何敢有今日土人識公者亦稱驍勇類海公而守正不阿過之惜早亡

布特哈由屯索倫也生有膽力善用强弓大箭嘗射鹿洞胸矢橫雙樹閒鹿奔而矢不折爲佐領以事罷潛之木蘭卽

車駕前一發得虎

高宗壯之取視其矢歎曰箭與錘耳呂布善射未必能爾累擢

至齊齊哈爾副都統

沙^晉呼倫貝爾索倫也驍勇號無敵俄羅斯憚之越境盜牲畜不犯其帳一日沙外歸聞牛馬爲俄羅斯掠去徒步追及盡剿則盜者十餘輩驅其牛馬唱以還自是俄羅斯兒夜啼稱沙晉來卽止如古人呼麻胡云

協領紐^倫瓜爾佳氏齊齊哈爾滿洲也素戇直習事所擬苟合

例將軍駁之輒搖首瞠目辯堂上必待盡諾然後已以是見忌思搆之會紐受部下羊草一千束乃以贖貨虐下劾奪戍伊犁初將軍劾紐已發摺事祕紐不知至是聞

命卽自去帽頂詣所司請速上刑具將軍微悔之傳令暫歸家與妻子別紐不顧登車徑去後赦還終於家

黑龍江外記卷七

四 廣雅書局棊

佐領恭^泰崔氏也管上站時往來自備粟脯不以擾站丁會冬月包魚雉幕府沿例徵馬革恭不奉令曰馬不死革安從來將殺馬以進革乎抑減馬芻秣以易革也其兄肇^寧固勸之卒供不如數後爲黑龍江佐領自度不能容謝病歸鄉居二十年年七十有五卒肇^寧嘗官參領以五世同堂旌門如例

摩凌阿俄倫春阿^{穆勒塔}公海^{蘭察}義兒也生而醜怪多力馬步逸追之掣尾則馬不前顧嗜酒飲輒醉嘗指瓶謂其儕曰瓦器何知容如許忘憂物我輩號骯髒者苟胍胍者不若寧不羞死後征川楚以功授總管加副都統銜

土人鮮能詩者惟聞崔君珽一絕云客況淒涼不可評挑燈獨坐待天明雙親若問今朝事風雨連綿在伴城又過將軍灘云

我本將軍子何妨過此灘君尙書阿爾賽子嘗捐州同刻有吟稿不傳

漢軍知習漢書然能執筆爲文者絕少其能尊禮文士以書傳家者尤不易得惟聞崔布衣璠不惜重貲購書史爲子延師歲費百餘金此爲巨擘近則水師營四品官果君德興年逾三十爲倉官聞謫戍者講四子書愛之遂命子弟悉讀漢書見一通文墨者雖在城旦鬼薪禮之惟恐失君猶子齊轍布受業於余故知之悉

達呼爾富林齊齊哈爾人以馬甲貼寫幕府喜與蒙館老生遊久之漸知書理習卜易祀先亦設神主部俗盡改同類目爲怪物不卹也嘗言跳神一事不見經傳旣知其非而因循不改用

黑龍江外記卷七

五
廣雅書局棗

夏變夷之謂何其識如此惜未三十病卒

滿洲漢軍及營站孀婦守節者有請旌例今齊齊哈爾城中節婦坊數座惟木城北梁氏一坊甄爲之規模較大俗有賢孝牌之號梁氏漢軍監生崔君珮室

齊齊哈爾烈女長姐馬甲西納穆保女也鄰人羅羅科逼污之長姐力拒被害事

聞入祀節孝祠此乾隆三十九年事近歲有某女者親歿養某協領家稍長協領將納爲妾女不從徑入副都統宅泣訴身爲旗人且與協領有瓜葛不應辱以賤婢副都統素厚協領乃官聘此女而薄罰協領以勾當公事至都又官屯女殊色者某協領欲娶之爲二房女不可父母逼之以死誓曰兒生官屯至賤

嫁三品至貴特未必相安且若家既有妻而又娶婦禮耶聞者莫不訾女福薄噫此獨非巾幗中有丈夫氣者歟惜佚其姓氏一滿洲媪鄰舍火起擬負祖先木主避之而繩屢斷至不可結乃坐地大哭將自焚婦視之所結者引火艾繩也又一漢軍媪夜半避鄰火且行且仆然猶手家譜一冊不肯授親故兩媪非知書者而所行合禮

布特哈老婦佐領妻也夫亡訟產幕府主者少之語偶不遜婦怒袖出一卷置頭上大呼云盲官認此何物敢辱四品命婦耶視之誥軸主者大窘

土人言初設十九站廬舍器具皆戍來之總督蔡榮捐辦按八旗通志名宦大臣傳蔡毓榮字仁庵漢軍正白旗人康熙二十年由雲貴總督內遷總督倉場戶部右侍郎轉兵部左侍郎尋以罪謫戍口外未幾

黑龍江外記卷七

六
廣雅書局

召還三十六年卒土人所云殆卽此公特其名字傳譌耳

阮侍郎葵生茶餘客話云猗氏衛爾錫旣齊撫黔時以苗變得罪戍黑龍江其友劉六皆爲之經畫行李歲時餽問不絕逾年召還於是見前輩交誼古道照人

一等男訥爾樸滿洲人康熙閒戍齊齊哈爾與桐城方君登嶧善鄂勒特犯哈密時

朝廷徵黑龍江兵進勦訥具狀請從不果賦詩云小醜逞螳臂天威振九征西陲馳羽檄東海動霓旌沙磧雙丸駛丹心一劍橫空存繫越志誰爲請長纓詩名畫沙集方君登嶧序云拙庵

十三年居窮髮之地吟誦弗輟暇則以蹇衛曳短車出郭荷鋤
移野卉數十種蒔階下非襟懷浩落烏能如此拙庵訥自號也
方恪敏公觀承未遇時變姓名爲馬飛熊往來齊齊哈爾左右
其父袁簡齋枚隨園詩話載公句云龍來陰嶺作游戲雷電光
中舞雪花卽此時作久之父歿方嚴骸骨還鄉之禁公盜之覺
杖幾死頃之復盜竟徒步負入關余嘗見土人家行書一幅署
名桐城方登嶧或卽公之尊人案方登嶧字梟宗號屏垢官工
部主事以家累謫塞外恪敏公
之祖也恪敏之父名式濟字沃
園官中書舍人侍父均歿塞外聞嘗撰卜奎雜志一書惜不傳
先叔母之祖李徵君錯漢軍人居盤山著尙史睫巢集世稱廌
青山人有兄錕號伊山官佐領以事謫戍徵君念其老病請假
省視居匝月歸事載徵君行狀戍何地未詳畫沙集有送李伊

黑龍江外記卷七

七 廣雅書局

山以運餉蒙

恩解戍詩云雪消遼海霽雲開揚柳春風拂面來萬里羽書飛
玉塞十年塵劒返金臺輓芻應比蕭何力勒石原饒班固才行
矣前程須努力漫憐羈旅重徘徊然則謫戍乃在齊齊哈爾而
黑龍江亦徵君遊屐所及故陳篋公梓爲徵君誌生壙稱其東
涉遼有所會心輒沈吟延竝或窮險極幽撫拾放失遇有道者
必質所疑叩精理蓋謂此也

富察尙書傅鼎雍正四年爲盛京戶部侍郎以事戍黑龍江九
年

召還李徵君錯作家傳云公遭峻責被嚴譴所親代之憂公方
率老僮腰斧伐山木故上有以結

主知而旁人莫窺其涯涘袁簡齋枚撰神道碑云公聞命負書一篋步往率家僮斧薪自炊於此見尚書行乎患難卓有本末

海寧李仁山援戍齊齊哈爾妻查氏自都買一婢偕來省視久之與婢各舉子歸贖仁山罪還於鄉查之弟儉堂中丞禮也所著銅鼓書堂遺稿中有文云雍正己酉仁山戍卜奎在京師北六千里自瀋陽抵卜奎中間千數百里無居民晝則子行夜則露處豺虎四嗥霜雪盈野數語寫塞外景象逼真但謂卜奎在京師北誤也六千里之說亦不合或其時道路故迂遠歟

河閒齊某戍黑龍江沒有年矣有子在籍欲收骨而艱資斧僞屑豆爲藥且行且售病應手愈因得善價莫測其所以然也已

黑龍江外記卷七

八 廣雅書局叢

負骨歸行次窩集遇三盜泣陳其事盜憐之贈金方拜謝一盜擗踊大號曰若藐孤不遠數千里爲此舉自命英雄如我可漠然置之耶因別其黨云若等自便我且之肅州尋親揮手竟去事載姑妄聽之紀文達公昫之書也文達自言十一二歲聞之叔父事當在康熙雍正間所云窩集林木深處非地名

滿洲世臣字嵩喬雍正丁未進士爲盛京禮部侍郎得罪戍齊齊哈爾一日點卯來稍遲主者鞭之歸卽恚憤成疾卒此乾隆十九年事嘉慶二年其子保文來訪遺殖不得晝夜持零丁哭市上甚哀一白髮者見之遙指倉後叢草云記少時見此葬一人聞其足履阜鞞乃曾戴紅頂者或卽若翁如其言措之果見阜鞞乃輿櫟歸白髮者漢軍也余嘗見而親詢之惜逸其名

齊齊哈爾城東一墳類僧塔而所葬京師蒙古也其人精術學
言事多中一時有半仙之目將死謂儕輩曰我某日死可葬某
地見有馬騎人者是吉時至期果有健兒負駒過遂葬之士人
至今道其事訪其姓名曰保額爾克

章響山汝楠紹興人乙榜宰甘肅得罪戍齊齊哈爾館水師營
呂家坐臥一室終年不出戶部侍郎保泰高其學品數招之不
就也門人呂君景儒將婚響山召與譚語云某昔與老妻初接
面約以寡言笑毋預家政比作令得三帨母一老妻弟婦分其
二若二則母一藏一不忍獨與妻也其善誘多此類久之老且
窮或周之可以無取必不取曰不忠不孝可復以貧賤累人乎
後赦歸呂君述其事程君煥爲文記之

黑龍江外記卷七

九廣雅書局栳

甘肅案遣戍道府州縣官在齊齊哈爾者若汪君皋鶴史君堂
黃君道熈今寺院皆有筆墨遺蹟惟宋知縣土人多稱其老而
工詩不幸客死然無能舉其名號鄉貫者隨園詩話云杭州宋
笠田明府名樹穀宰蕪湖有賢聲罷官再起補兩當縣過隨園
一宿而別聞爲甘肅案謫戍黑龍江年近七旬恐今生未必再
見幸鈔存其詩然則土人所稱詩話所載也

流人通文墨類以教書自給齊齊哈爾最著者江西王雨亭霖
教授八旗義學仿周興嗣千文撰萬字文未就卒天台齊丹峰
傳繞老不廢詩或傳其在獄咏岳忠武手植柏云冰雪含神古
風波抱恨深佳句也家有寫本萬卷樓稿余嘗借而觀之蓋次
風宗伯召南之書丹峰宗伯族子後亦死戍所河南李謙六慎

吉初備呂君景儒家既呂君見其能文請爲諸子師有勸其立家室者謙六以家有糟糠辭時人義之俄卒裁三十餘又范如松者字近光安南人事黎維祁爲大臣阮光平立入中國安插水師營亦以訓蒙爲業識者稱其熟於史鑑慷慨有華風後釋歸國

常州龔藥林光瓚戍齊齊哈爾妾生子小名寶寶聰慧嗜讀書將軍那啟泰數使鈴下蒼頭負入邸第命說易大義一日寶寶

問將軍乾爲天爲父坤爲地爲母天地父母一而已我乃一爺而二娘然則地固可多於天歟將軍無以對漫曰在常州爲江南地黑龍江爲塞北地地雖多其實一也若有兩母將毋同寶寶諾之而心不然頃之口占一聯云秋光凝白露寒影入黃花越數日竟殤時重陽後也裁九歲

黑龍江外記卷七

十 廣雅書局叢

關內人來貿易俗稱跑腿有費姓者不詳何籍在齊齊哈爾貿易頗以信義稱一日致粳米一石於章君汝楠且畱小摺請憑此日取觔肉以養老章君訝非素識卻之費厲聲曰某非有求於先生以先生行誼過人而貧若是故分衣食之餘供養之卜奎之大安知無類某者聞風繼起則先生可以不死某豈有求於先生哉章君卒不受費涕泣去不知所終章君嘗作詩記其事後程君煥和之有廉讓之間容我輩漢唐以後得斯人句費可不泯矣

土人無知醫者醫多來自內地余惟聞晉商武詡善鍼灸施藥濟人不計利得良醫體章君汝楠爲作傳以授呂君景儒呂君

亦業醫讀書心細不輕下藥偶時疫作陰合藥投井中活人甚夥是眞不愧武詡

黑龍江外記卷七

十一

廣雅書局棊

黑龍江外記卷七終

大四十八

小五